

萬

曆

疏

鈔

萬曆疏鈔卷二

聖德類

胡 洊 矜放宮人以光聖德疏

謹布思 隱憂當杜忠言當納疏

鄒元標 直抒膚見以光聖德疏

董 基 止內操以光聖德疏

蔡時鼎 重視聽以悉民情疏

王學曾 停取異物以光聖德疏

盧洪春 慎起居明詔旨以光聖德疏

劉爲楫

恭陳四劄以裨端本防微疏

雒于仁

恭進四箴疏

林材

省發章奏以弘聽納疏

謝廷策

朝講久虛及時修舉以光聖德疏

王就學

懇請攀送梓宮以光聖德疏

王德完

恭請篤厚中宮以光聖德疏

馮琦

仰繹君臣一體之旨以成泰交疏

吳達可

敬陳格心要論以效愚忠疏

宋燾

體天道宣元氣以暢皇仁疏

汪若霖

聖學方新仰祈宸斷以光聖德疏

張濤

靳望

聖明克孝克慈克敬克仁克宏雅度疏

萬曆疏鈔卷三

聖德類

矜放宮人以光聖德疏

胡

濬

廣西道監察御史
隆慶六年十月

竊聞災異之來治世不免而古先聖王克謹天戒則
每變災爲祥咎不爲凶蓋天心眷愛人主凡有災祥
必先示之以兆固欲國於未然防於未著以成明明
之后也是故宋景出人君之言而妖星退舍周宣側
身修行而旱魃不能爲災故有國家者不患災異之

至而患無以弭之至於弭之以虛文而不修之以實政則雖日下省躬之詔日捐太倉之粟盡釋囹圄之囚無補於人事也蓋爲治有要機而弭災有急務識其要且急者而圖之則挽回氣數計安社稷皆在於君則今日之所以感召和氣以開有道之長者豈在多言哉我皇上以幼沖之年嗣登寶位聰明天縱神武渙發誠以祀宗廟孝以奉兩宮仁以保四海大察以去不肖宜乎和氣致祥諸福畢至而景星慶雲之迭見水旱凶荒之不作矣夫何畿甸之內歲

谷不登千里怨咨每見章疏臣竊念之數日以來傳聞斗北角度忽有大星纏入光芒燭地未夜而見中外驚疑臣民駭異此皆天心將佑我國家仁愛我皇上欲及時修省思所以召變之由也臣不諳天文稽之人言在士人有以兵戈之釁夷狄侵中國爲占者在下民有以暑雨祈寒饑饉荐臻爲占者杞人憂天浩不可測有以四方固可慮而蕭牆之患不可不防邊陲固可念而腹心之疾不可不治又於本月十六日夜慈寧宮後延燒連房爲宮嬪所居之地則

災沴之應信在宮妾無疑也何也星陰象也水積陰所生也陽日以進則陰日以退而星辰順度賊火不作天下寧謐矣今一旦妖星入於角度火異見於禁中此豈細故哉嘗聞東海殺孝婦而三年不雨一孝婦而上下天和至於此則今日兩朝宮女閉塞後庭老者不知所終少者日懷怨望寡婦曠女長門聚訟疾首蹙額寒風月露愁苦萬狀此皆感傷和氣而召災異者也故於今日弭變之急務莫要於釋放宮人而他不服論焉說者曰後庭宮妾皆供奉先朝未可

遽棄誠是矣不知先朝宮妾纍纍數百人被寵幸者
終其身無怨矣至於白首望君王之面紅顏作紈扇
之歌獨可枚數哉有一於此足干和氣而況後宮千
數日望開釋之詔哉爲今之計惟望 皇上勅下司
禮監查明先朝寵幸宮人若干人則優遇之體察之
以安其心而使之分願各足至於未臨幸者無論老
少悉賜釋放有家者各聽其父兄子弟收還之無所
歸者使內臣之家姑安置之俾得各行其志如是則
陰疑不伏陽明日長卽有妖孽退避三舍何足以厘

皇上之憂哉臣愚過計又不止此唐高不君則天爲虐幾危宗社此不足爲我皇上言之而往古覆轍亦足爲鑑然則今日臣愚惓惓爲皇上言之釋放宮人豈啻弭災異實所以光聖德也如是而又堅執初心復召一二閣臣講求災變之由徵在君身必謀何以表正之徵在姦回必謀何以斥遠之徵在戎狄必謀何以操馭之徵在小民必謀何以綏輯之他如遵祖制以抑濫請節財用以厚民生日御經筵以廣治道皆所以召天地之和以開億萬年無疆之治

者惟 皇上嘉納之臣愚不勝幸甚

隱憂當杜忠言當納懇乞采擇疏

譚希思

南京福建道御史
萬曆十二年六月

臣聞稱成湯者不曰無過而曰改過美周宣者不曰無闕而曰補闕何也彼其忠言之聽納者固辨之早而斷之勇也恭惟皇上御臨以來輔臣任矣視學勤矣權奸斥而忠良顯矣中夏乂安而四夷賓服矣從善如園納諫如流凡諸臣之有志匡時者莫不爭摠愚悃冀効一得卽謫陋如臣曩以內庫節慎之說進雖未垂允亦荷包容臣方稽首私幸謂有君如

此真可六五帝而四三王矣更復何言乃近者中外
私計僉謂朝廷之上有大不可者三事其一謂高
祖之制非軍功不侯令甲詔亦而世宗爲中興聖
王查軍功冒濫今五十餘年無有犯者一旦李文全
復伯爵是皇祖防閑戚畹之制自皇上而聿更
矣其一謂祖制提督太和山原係郎中叅議等官
近以內臣兼分守已非令甲之舊今又削藩臬之協
守者而專任內臣是皇上設官守土之制自皇
上而聿改矣其一謂祖制京師有營有衛司馬掌

之疆場有戰有守督撫王之載在令甲者肅如也今
言者謂選兵三千操演內庭是祖宗環衛闕廷巡
防輦轂之制自皇上而又一易矣夫高祖起自
民間情狀洞如其憂深慮遠類爲聖子神孫千
萬世計以天縱聰明如皇上即使祖制未盡尚
當潤色而光大之況以必不可不遵之法而牽於必
不可徇之情縱其必不可開之實則所謂鑒于先王
成憲其永無愆者陛下或未之熟審矣故一時科
道部臣如劉士忠等有公疏矣如張文耀董基等有

獨疏矣之數臣者曾何利於犯天顏而蹈淵谷哉誠
爲已往之成法不可撓將來之隱憂所當防故敢出
死力陳忠言冀謂皇上之天庶幾乎湯宣之善補
也乃奉明旨不曰已有旨處分則曰如何又來瀆
擾臣恐伯爵復而倖門開矣督守專而橫害恣矣禁
地操而禍階萌矣其爲宗社生靈之累將來有不
可勝言者故吏部尚書楊巍懼戚里之矯縱踰制而
莫由禮終也故直指周英王濟之革例不可復都察
院都御史趙錦懼三省之進退驟聚而蘖芽易生也

故直引劉千斤廖麻子之故事以寓諷兵部尚書張學顏懼禁地之兵難於有制也故又舉武廟之練兵西城因而私置干戈者以爲言夫楊魏趙錦時望素重張學顏志在飭邊藉令無大關於安危利害此三臣者受知特深感恩特隆何爲進逆耳之言爲弼違之說哉蓋有大不得已者以嬰其情也皇上試取盛疏而再干熟觀之則其危言謹論自無能逃曰皇往遼洞鑒矣臣伏讀聖旨於李文全之請則曰仰體慈衷於內庭操演則曰爲聖母謁

陵扈駕計至於田王之在太和山也推 皇上之心
得無曰爲祝釐 聖母萬壽計乎信若是 皇上仁
孝之心昭如日星天下臣民亦諒之矣然與其順文
全之請而快 聖母於一時也孰若舉 章皇后之
爲外戚慮者諷 聖母爲女中堯舜之尤爲孝乎與
其奉 聖母謁 山陵而不免沐風櫛雨勞民殷憂
也孰若 慈闈日煖於深宮而問安視膳不傷財不
履險之尤爲善乎與其專田王以攝守之權而不免
鑒前思後分志明禋也孰若仍以藩臣代其憂而使

爲王者得虔恭明畏一意奉神之尤爲得手況今謀國之臣抱杞憂者莫不曰外戚漸肆武備漸弛姦宄漸萌皇上誠爲懿親謀則宜乘方張之勢示盛滿之戒潛消其覬覦之念使無爲造物所忌而福澤綿延之是引可也伯爵未可復也誠爲武備謀則宜於講學聽政之餘以簡閱勅本兵以優恤勅邊臣使三軍之士勇氣百倍卽萬一有警而折衝禦侮之足恃可也內庭衆可操也又誠爲奸宄慮則宜委內臣以山場責吏姦盜控馭地方不靖司道不檢撫按

糾彈使橫恣之毒無自而施潛伏之患無自而發可
也分守之勅未可易也且陛下以今日爲何如時
哉滇南以方捷而報警宣大以互市而懈備遼左甘
肅孤懸可虞水旱災異歲且屢見閭閻蕭條邊儲告
匱此正主憂臣危臥薪嘗膽之秋而此三事者乃竝
發於期月之間是果當務之急乎抑亦蠹沿之機乎
誠微之士多懷長慮奈何諸臣之苦口不能挽皇
上之聰聽臣恐竊美威柄日新月盛尤有出三事之
外者語曰未見其形願祭其影又曰萌芽不折將尋

斧柯誠善喻也。陛下獨不念祖宗防微之意乎。
臣請以祖宗故事之最宜急復者熟陳於
父之前而請皇上試垂聽焉。其一曰絲綸之簿宜復。
臣聞高祖時凡中外奏疏命尤右粘之壁間甲乙
治之裁決如流粘壁有誤日數易者每斷大事決大
疑臣下惟面奏取旨有所可否則命儒臣折衷古今
而後行之批答皆御前傳旨直筆郎所書天語尙濕
也永樂洪熙三朝大都仍高祖之舊而倚毗尤專
宣德時令內閣楊士奇尙書蹇義夏原吉等凡章奏

許用小票墨書貼各疏面以進謂之條旨蒙留閣中
號之曰絲綸簿御批易之以紅其大事命大臣面
議議既定傳旨處分視宗制潤色焉迨正統初中
官王振擅恣矯旨特奏收簿於內由是忠言不行而
土木之難及矣弘治間鑒正統之失朝綱親攬幾復
國初嘉靖間懲正德之弊剛明竝用權無旁落此國
脉所以靈長者有自也夫啓皇上光撫鴻圖嘉納
大臣同符烈祖然所以通下情而攝奸慝一政體
而杜壅蔽臣以爲內閣絲綸之簿所當議復亦愛禮

存羊之大端也其二曰實封之舊宜復夫通政司所以出納王命爲朝廷之喉舌宣達下情廣主上之聰明於政體關係最重也洪武永樂間奏題實封皆自御前開拆故凡蠹國害民幾伏隱微者有奏卽行未嘗倖免至天順間有投匿名言朝廷事者於是始有關防然但拘留進本人在京候旨旨下卽縱之未嘗窺見其有奏事也不知始於何年乃有拆封類奏及副本備照由是但有訐奏權勢宦戚等項未進而幾因泄被奏者往往經營得免奏者多以虛言受禍夫

南北科道義同一體今在北者得徑奏而在南者通
政司拆其封且有備照副本焉是 祖宗防奸慮患
之意蕩然無復存矣此成化間汪直專柄恐人議已
始有是舉此尤非朝廷本意所當急議復者也其三
曰鐵牌之置宜復 臣讀 皇明政要記我 太祖鑒
漢唐宦官之失嘗置鐵牌於宮門內高三尺許上鑄
內臣不得干預政事八字宣德中此牌尙存 英宗
時王振專恣因失所在 臣按 祖宗朝深思遠慮每
重大關節必置牌示儆今午門外所豎紅牌亦書官

員人等說謊者斬其戒內臣牌卽此意也然內臣預
政之戒視官員說謊所係尤重故不以木刻而以鐵
鑄不設午門而設宮門其微意可想矣蓋閹宦之權
與公卿相盛衰主上憂惕日勤召問則公卿之權勢
稍涉疑二旨多傳奉則閹宦之權勝其幾甚微其勢
甚可懼也今 聖明御極內臣多謹固無足慮然
皇上以 祖宗之志爲萬世久遠計臣以爲此牌宜
復置庶觸目儆心而專恣之權世世有所憚而不敢
萌矣臣狂瞽之見不識忌諱芹曝之獻實出忠愫惟

願皇上俯察愚衷收回成命停武清之爵仍守臣
之勅止內操之兵而又將臣所請議復祖制三事
下內閣部院大臣計議如與治理有裨亟賜采納施
行以杜未萌之患以慰臣工之望以歸天下之心則
聖德益光聖治益隆所以鞏皇圖於苞桑之固
者端在是矣天下幸甚臣幸甚

直抒膚見以光聖德以奠民生疏

鄒元標

吏科給事中
萬曆十一年八月

臣江西吉安府吉水縣人中丁丑進士建言謫戍貴
州都勻衛投荒萬里母子睽隔伶仃孤苦日濱九死
甘瘞骨堀穴巖之中矣廼荷隆恩拔之沉淪復齒

縉紳

臣

將母北往期霜升斗以供菽水復何它覲不

意

陛下俞臺臣之請授

臣

以給諫之職拜命以來

凜凜未能稱職是懼已思學貴經世言貴適用時當
有事緘默自持是爲曠職時當無事激切自許是爲

沽名今 乾綱獨斷 聖政一新所在懷忠良抱經
濟者搜自巖穴卽杜口不爲取容矣且 臣少承嚴父
之訓長遵師友之學知悻悻者徒小節而激切者闇
中和深自懲創恐負明訓敢嘵嘵自多哉昕夕循省
念職事不可久虛 隆眷不可徒負不避狂瞽敬瀝
百一夫譚天下國家之事在握其要得其要則衆政
畢舉不得其要興一政釐一弊亦徒竭精神已爾史
稱堯舜之知在急先務矧知不若堯舜者能役役爲
天下用哉故 臣之所譚其要惟在培 君德親臣工

肅憲紀崇儒行飭撫臣瑣屑細微之事暫不敢以瀆
聖德嶽嶽高山不讓飛埃蕩蕩洪流不棄涓滴惟

陛下以

臣

言爲飛埃涓滴留意而詳擇其中

臣

不勝

大幸

臣

聞人君宰制萬物役使羣動必有握其樞者

心是也心體至大不冒乾坤心體至靈同符二曜或
失其體者何哉欲累之也欲在奸聲淫蛙襍奏心以
聲移矣欲在亂色柔曼爭進心以色移矣欲在口腹
甘旨竝陳心以味移矣幾有可間左右得而間之隙
有可乘嬖倖得而乘之其幾始於微眈其禍至於尋

丈堯舜致兢業之防詩書紀危微之訓故能保世滋
大 陛下履綦隆之運何求不得際鼎盛之年何欲
不遂求必得則人欲日滋欲必遂則天理日微聖學
從茲荒矣孟軻氏曰養心莫善於寡欲宋儒周敦頤
曰無欲則靜虛動直明通公溥願 陛下味孟氏寡
欲之明訓遵敦頤無欲之格言研幾於聲色臭味之
間致謹於視聽言動之常居處有時無以閒居幽獨
而有情容行幸有節無以血氣方剛而有銳心此匪
獨養德已也卽養身亦在其中焉精用而不已則竭

形勞而求已則敝無欲則形充則精固而身可長保
矣戊寅歲_臣在戍所邊民自京師來者道聖母還
宮時惓惓以聖躬爲念邊民無不舉手加額謂聖
母至仁陛下至孝陛下身安則聖母之心亦
安聖母心安陛下之孝亦大矣漢臣汲黯云內
多欲而外施仁義奈何欲効唐虞之治乎偉哉斯言
萬世人君之龜鑑寡欲明訓誠今日養身養德急務
首願陛下朝誦而夕惟之也君臣之分森若冠履
手足腹心實爲一體下每願忠於上每苦上之不達

上每求忠於下每苦下之不誠此亡它堂陛勢懸而
情意間隔故也二典三謨治化隆盛都俞吁咈猶可
想見易之繫卦上地下天則爲泰上天下地則爲否
否泰之機明良之義其所由來者遠矣臣往閱三朝
聖諭錄天順日錄迨我孝宗敬皇帝世宗肅皇
帝朝君臣相與歡若家人煦若父子或用一人而互
爲可否或行一事而曲爲調停父老傳之史冊載之
以爲盛事陛下昔在沖年保傳必慎今聖齡日強
臣愚以爲有大政事如人才錢穀禮樂兵戎刑獄工

作宜召內閣九卿侍從儒臣面爲揚確許科道官旁
爲糾正何者 陛下所閱者諸臣章奏而已其繁委
可厭也召對必能陳說利弊開道禍福不事繁文而
庶政惟和矣 陛下所接者諸臣儀容而已其人品
未知也召對必能洞燭忠邪鑒別才品卒然有警而
任使惟當矣宣上意而達下情者 陛下內臣而已
過請益言未必真也召對則讒間不行猜忌不生上
下交而其志同矣或以御門有常亦足致理言之雖
美窒礙難行 臣憶 文皇帝在右順門諭近臣云早

朝奏事不得盡言午後事簡卿等得從容陳說朕亦
欲及時商確英明神斷如 文皇帝豈顧不自暇自
逸哉以爲不如是不足以盡羣情而登上理也武英
殿 祖宗朝召見大臣裁決庶政之所 陛下一旦
鼎新縉紳之所揚誦閭巷之所傳播皆以 陛下銳
然復 祖宗朝故事今大工已就宜筮日舉行召對
盛典或先行經筵始摘一二事與大臣諮詢則上之
志日下達下之情日上孚聖心日益開明聖政日益
廣大 列聖明良相與之盛事亦於今重光矣民財

告匱饑宰相望諱者曰有司之不職也請嚴懲貪吏
者其說甚具臣則以爲憲紀之未肅也拊循統馭職
在有司秉憲揚休責在臺省苟得其人持身奉法則
吏畏民安不得其人依阿澳浚則吏隳民殘伏覩明
旨云科道官須心術純正奉公砥節無踵弊套大哉
皇言下燭窮部第弊端所在陛下隱而未發臣請
得而竟之省之職職在封駁其有隳節敗度骫法徇
私容臣等共相交勉以圖報塞供奉輦轂依邇天憲
廼臺臣弊則可爲長嘆息焉昔薛瑄在朝三楊一見

且不可得而屈其節槩足徵也出巡三楚政暇惟手
抄性理其清操足覩也一時人物淳龐臣思及此未
嘗不洒洒毛豎先年一二臺臣昏夜乞哀冠裳掃地
剝生靈脂膏以媚要津竭公家庫藏以充私囊折儀
千萬視爲簞豆郵使絡繹迹遍列省贖錢不足佐之
公帑公帑不足托之郡邑承順者輒曰辦事薦揚之
恐後拂志者輒曰無爲彈罷之恐遲財在天地止有
此數用之者旣如泥沙取之者又安得不盡錙銖上
有盜竊之行則下又安得有自殖之民無惑乎行轅

空虛而饑餓者衆也迹之所履者大貪大惡而其所
劾者小貪小過其不反唇相譏者幾希此豈可持繡
斧立百執事上耶不特識者憤懣亦諸臺臣所甚惡
者有臣如此將焉用之往事雖無足論迄今不爲嚴
戢源不正而末流益濫矣臣叨在班行見臺省諸臣
濟濟蹢蹢極一時之選其志必欲以激濁揚清爲職
以忘身奉公爲念臣願陛下渙德音下明詔召內
閣大臣直書弊端倣正統宣德年間勅諭事例懸之
臺省以垂永鑑臺中奉差諸臣不患無才患身不正

而威令弛也回院考察惟以砥節者爲上仍將憲綱
事例重爲糾正如餽遺所不免者揆之道義無溢常
度牌坊所必建者關係風化無得槩施操守端則憲
紀肅憲紀肅則羣吏畏懾雖有貪黷者且將聞風而
靡從化而流矣貨財不聚民生不遂者未之有也或
曰臺省情親義無異同臣竊謂純心爲國雖相爭如
虎不害其爲同孳孳爲利雖情係骨肉不害其爲異
臣言雖異心則同也且業已稱爲朝廷耳目臣矣
目者謂其無所不見也一芥眯目天地易位矣耳者

謂其無所不聞也微塵塞耳鐘鼓弗聞矣耳目之官
不清而欲糾羣吏之貪酷拯生靈之休戚是借聽於
聾求視於盲也國初遣御史巡行郡縣我太祖諭
之曰爲治以安民爲本民安則國安當恤民疾苦據
法守正未有公帑空虛而民得安者亦未有昏夜乞
糴而謂之守正者臣故曰憲紀之當肅也仕者突梯
滑稽脂韋潔楹歡若管鮑陰相排擠臣不以爲憂臣
所憂者學益未明而儒道大詘也儒道大詘始於上
之推剝而法令行也常州知府施觀民糜費民財私

秘書院毀之誠是矣迺槩將先賢遺跡一槩拆廢
不知其解也彼敢於蔑先聖之道者不過惡聚講假
偽學以箝天下之口耳孔子大聖尙以學之不講爲
憂天縱聰明如陛下日講有常經筵不輟卽仁聖
豈加於孔子而睿知豈出於陛下者哉宋真宗錫
九經於州縣學校矣尤及聚徒講誦之所聚徒講誦
自古已然未聞槩以偽學斥也天下生材固於所稟
資有純駁故功有真偽百偽之中得一真焉亦足以
維世道在顏風因偽棄真是因沙廢金因饒廢食矣

佛老之道異於孔子習其說者焚香頂禮千百爲羣
琳宮梵刹遍滿郊垌士誦法孔子譚詩書欲將先聖
流風漸滅殆盡亦忍矣天啓聖明將宋儒白鹿石鼓
等院不許槩棄是 陛下且欲衛先聖之道以詔來
茲雖然豈謂我朝人物出宋下哉 祖宗菁莪樸棧
作人者深諸儒漸仁摩義特立者衆如薛瑄陳憲章
羅倫王守仁等先後以理學名者不下數十人禔躬
垂訓宛然濂洛家法未可謂國無真儒也今儒風不
振久矣上之所禁下之所避上之所作下之所效也

士不鼓不趨教不振不從

臣

愚以爲凡所拆過書院

先賢遺蹟宜勅禮部令郡邑或槩議修復或量爲調

停雖未必真儒輩出然使天下曉然知

陛下崇儒

重道盛心學術從此而正士習從茲而端未可知也

宣德初大理卿胡槩請修整胡瑗魏了翁書院卽諭

工部尙書吳中曰崇名賢於旣往正以獎後進於將

來宜從所請載在實錄班班可考史書載循良傳至

勸學興文未嘗不艷稱之矧

陛下舉動上法

祖

宗照曜史冊傳之天下萬世其關係詎小哉

臣故曰

儒術之當崇也水旱頻仍災異繁興列在奏牘亦既
爛然蠲恤之詔屢下閭閻之困已甚此其故何歟臣
以爲其機不在朝廷而在撫臣古人得百里之地亦
足以使民富強何至擁一方重鎮而使民皇皇若是
哉國初出鎮大臣命之曰撫者謂其拊摩鞠育與生
民安養休息之謂也匪欲樹奇功博崇名已也古來
名臣出而鎮撫惟悶悶自持不煦煦以求知地方饑
饉有勸富戶出粟活民無算者有責令有司收撫流
移不使蕲之四方者絕不以厘窳拊在則民德去則

民思先年二三撫臣冒軍功者糜爛其民雖拜爵受
賞朽骨冤魂叫號春雨秋霜之下者不知凡幾矣嚴
催徵者敲朴其民雖考成奏最剝肉補瘡啼泣箠笞
縲紲之下者不知凡幾矣封疆雖擁乎大僚書算下
同乎小吏甚至亡而爲有虛而爲實人皆曰干城之
器揮霍之才生民痛癢漫不相關謂撫之義何雖然
其原始於任之太輕故也宋神宗謂文彥博曰諸道
使臣職任至重宜擇其人彥博對曰爲治之要無以
易此當時韓范諸臣皆一時名流今之巡撫視宋諸

道使臣又爲加重簡擇其人猶懼非才乃今仕者一
得內補垂涎京堂旣得京堂坐列開府未得如農夫
之望歲旣得如拱璧之在抱患得患失之心重爲國
爲民之念輕伏願 陛下念斧鉞之重寄憫生靈之
無辜陞擢惟以直亮端方廉明無黨者爲上諸冒濫
鑽刺輒熟可厭者絕勿使竝進其現任事地方者除
各邊專理軍務外如腹裏地方仍乞勅都察院轉行
各處撫臣須存大臣之體思撫摩之義以安養休息
爲主以愛民節用爲本以正身率屬爲先水災地方

其所或征者猶有田之民也有地無立錫褐無完裳
夕無宿春者可念也古有富戶出粟活民無算者其
法可陳也有竢獨鰥寡顛連無告扶持通衢者可憫
也古有責令有司收撫流移者其義可知也闢田里
課農桑厚風俗嚴貪墨古人有行之者其意可師也
全紆將賑過窮民撫過流移行過事蹟造爲成冊解
院無視爲文具政安則民和民和則天地之和應之
雖有水旱不能爲異雖有災異不足爲憂矣林總撫
山東大同周忱撫蘓松常鎮旱乾水溢何日無之然

惠流民安四境晏然彼其下豈皆賢百執事哉撫臣
者百執事之表也表端則影正源潔則流清百執事
雖欲不兢兢奉法不可得也得百良有司不如得一
賢巡撫有一賢巡撫不患無百良有司臣故曰撫臣
之當飭也以裨君德以弘化理以振士風以飭吏治
今日急務誠莫有大於此者臣猶有說焉今天下如
人一身內如心腹外如四肢精氣消耗殆盡非培養
珍膏鮮克攸濟先是世務爲操切爭威嚴以相高閭
里蕭條無復太和景象臣願陛下崇渾厚以培國

脉廣仁愛以答天心節財用以惜民力酌賞賜以慎
名器親君子則儉壬日遠求經史則外奸日遷蒼赤
被樂利之澤宗社衍靈長之慶矣

丘內操以光聖德疏

董基

刑部任事

萬曆十二年五月

臣惟自古天下國家治忽之機常始於微而防於著
防之於微也易爲力而求之於既著也難爲功故自
古聖賢之君就業微惕慎重凝靜卽一言一動必裁
於道初不敢恣其意之所向以生事端以開釁萌誠
慎其始而圖之於微也乃皇上近日之舉動則其
微誠有可慮者臣所以不能也於言也臣於去年車
駕還自山陵卽聞臣皇上陳兵內庭此時臣以爲好

事者誤傳。皇上萬無此意。卽有之。亦一時偶言之。未必真有此舉。乃無何而簡選中官矣。又無何而取用馬匹矣。至本月初五日。外議紛紛。皆謂皇上以是日幸西城閱營較射。日夕乃罷。一時該操中官久立炎蒸之下。不勝困憊。垂死者數人。臣聞之。無任驚異。夫兵凶器也。內庭清嚴之地也。古聖王觀兵不庭。尤稱曰不得已而用之。乃皇上無所不得已而聚三千之中官。輕以凶器常練於清嚴之地。此臣之所未經也。臣謹按其當停止者四端爲皇上陳之一

曰杜意外之變夫馮保之盜竊威福目前之事也
聖怒一震而保卽俛首聽逐者以未嘗假之兵權耳
假令保而有兵權事未可知也當此內臣誠多善良
然寧保其盡如今日乎萬一而有如保者出則今日
之兵將爲之藉矣二曰養安靜之福前者駕幸山陵
屢厯以聖意以爲有此三千人者或恃以無恐則行
幸將多也不知此三千人者皆膏粱綿薄之輩一無
當於實用卽以十健卒躍馬揮刃而來立見披靡又
焉用之故此輩真不足恃車駕萬不可恃以輕出也

三曰止羣小之怨夫三千人者舊皆散處各監各廠安居美食已久一旦使之披甲執銳衝冒寒暑濱於死地將必不可支不可支則生怨怨則生變前日抗州僅以月糧鬥夫小故激而成變幾至不可收拾況乎禁庭之內而可使三千人有怨也是誠可慮也四曰省無經之費夫止用金花銀每年例有一百二十萬矣然猶歲稱不足今日借太倉明日借馬價是濫用之明效也乃今日舉此以來賞賜且二萬金矣由此計之將來所費寧止今日累數年後將使數十萬

有用之財置之無用之地是誠可惜也。大人臣之謀國惟其利於國而已。無論利害相等。即使利多害少。智者尤不以利買害。乃今百無一利而害且不可勝言。皇上貴爲天子。以天下爲一家。百姓樂業。四夷咸賓。萬幾之暇。以遊以豫。皆足以自樂。而何獨以兵爲樂。將計萬世之治安乎。則今平治已久。武備漸弛。團練多備員。武庫皆朽器。奈何不思一大振之。而徒觀兵於內地也。又如窮邊極壤。橫戈帶甲之士。日不再食。歲不再衣。出萬死以守封疆。則皇上奈何不分

今日賞賜之半一優恤之而徒以供一日之樂也臣
揆之事體度之利害採之輿論知此事決不可有有
決非國家之福故敢冒死陳之伏望皇上採納菲
葑亟爲停止則國家億萬年無疆之休端在茲矣雖
以出位之罪臣死不避也

重視聽以悉情羣疏

蔡時鼎

雲南道監察御史
萬曆十三年十月

臣竊惟自古帝王所以不出堂階而明見萬里之外
者惟以其日與大小臣工講求幾務期於至當夫是
以人無親疎皆得自盡事無遠邇咸得洞照非以其
寄耳目於不可盡信之人而以為明察行威令於未
必盡實之事而以為剛斷也 皇上聰明神聖超出
千古卽位以來剪除姦慝嚴懲貪暴中外臣庶莫不
欣然共仰聖德顧近日之事或有不由外庭糾舉

徑從中出遂使舉朝惶惑皆以爲挾私之徒造爲飛
語密揭直達御前此其漸不可長廼大小臣工所
共憂虞痛心臣忝居言責焉得緘默夫匿名告揭律
有明禁雖在外諸衙門尚不得妄投況乎宮禁
清嚴之地而敢以此瀆聖聽縱使其事盡公其情
盡實猶恐其啓讒間之門滋陰害之路況又有以實
而濟其誣因公以遂其私者乎卽如冑籍一事旣出
於實則禮部科臣自然不爲隱蔽至於有無干礙考
官外庭之臣人人知其無故三法司及科臣皆執法

從公勘究明白而皇上以先入之言爲無隱以疑
似之跡爲有因盡疑部院科臣謂其扶同回護臣愚
竊以爲譖愬之語利於中傷懼於公辨是以聖王之
賞罰必昭然與衆共之非情見卽真理屈詞窮者不
明加典章焉是以下無滯情上無私斷若不信公辯
之言而信陰私之口則在皇上方以爲發姦摘伏
能知人所不知斷人所不斷而天下之情反有壅遏
而無由自伸者此道一行則法典不足以昭太公賞
罰不足以示勸懲徒使宮庭之外人人自危其爲

禍不滋大哉且部院 皇上之股肱也科道 皇上
之耳目也 皇上盡疑股肱耳目爲不足信豈所
之人皆盡忠信無私而可託腹心有逾於諸臣者乎
故曰偏聽生姦又曰上下交而其志同此乃理亂之
機願 皇上熟察之也若夫冒籍生員雖陷法禁然
其罪至於削籍已無復加今將二名枷號一月萬一
嚴寒之下斃於桎梏則匹夫含冤所關非小恐非所
以彰 聖德令衆庶傳播也 皇上后日倘或悔之
其將謂臣等今日不言乎 臣方聞再問嚴旨恐處分

未定疑於黨救故隱而未敢言今明旨已出不可

復回

臣

已知救之無及但

臣

所惓惓大願者惟冀

皇上自今以後凡百幾務寧公示外庭明辯是非毋以羣臣之言盡不足信毋以親狎之言盡不足疑朝堂之上法紀森然詭秘之私自無所容皇上推誠聽信誰敢懷奸以自甘欺蔽者凡事處分既當則天下之人自莫不共仰聖明即帝王之大業及祖宗之盛治其道皆不出此至於一切飛語密揭多係矯誣必屏不使至前蓋風聞糾察發奸摘伏乃羣臣

之職 天子與天同覆與地同載英明之效固不在
發摘之末也 臣愚昧無所知識偶有一得不敢不以
上獻惟 皇上留意省覽 宗社幸甚 臣愚幸甚

停取異物以光聖德疏

王學會

南京湖廣道御史
萬曆十三年十月

臣

近接邸報禮部一本傳奉事該文書房太監劉成

丁傳

聖旨聞河南產有麒麟撫按如何不奏着禮

部傳與他上緊進來欽此隨該禮部具奏續奉聖

旨覽卿等所奏知道了但麒麟鳳皇世所異物而比

他瑞不同朕於罷瑞獻豈不知惟欲一見耳還着彼

處撫按官上緊進來欽此

臣

仰見

皇上之意不過

以麟爲瑞物向來未見今止欲一見似於

聖德盛

治無妨也

臣

復何言但捧誦綸音一則白聞河南產

有麒麟撫按官如何不奏一則曰朕於罷瑞獻豈不

知惟欲一見耳

臣

請自

皇上之所謂聞者願

皇

上之慎其所聞而益進於其所未聞也請自

皇上

之所欲見者願

皇上之慎其所見而益進於其所

未見也

臣

聞四方災異水旱盜賊日以奏

聞此撫

按事也矧麟之爲靈昭昭也旣產於盛世撫按敢不

以奏聞哉但竊聞此麟產於光山託生於牛腹一時

卽此不祥之物撫按敢以上聞哉撫按旣未嘗奏聞

不知 皇上之所聞者果聞之三四輔臣乎抑聞之
部院大臣乎抑亦聞之臺諫言官乎夫三四輔臣未
有聞部院大臣未有聞臺諫言官未有聞 皇上深
居九重雖聰明天縱何由卽聞產於河南乎 臣遠在
都實不知其所自但以 臣意竊揣之無亦左右小臣
以奇怪取悅 聖心多方差人訪求或傳聞於道路
或收買於繪圖務爲鼓惑計耳若此者非 皇上之
所宜聞也此端一開日積月淫將來乘間竊發潛聞
於 皇上曰某省出有某物某地產有某瑞可着禮

部上緊取之又其甚者則必曰聞文臣某人可用可
着吏部上緊陞之聞某處錢糧可用可着戶部上緊
進之聞武臣某人可用可着兵部上緊轉之聞某人
問某重辟可着刑部上緊釋之聞某處工堪修造可
着工部上緊造之聞某處某官可逮可着錦衣衛上
緊逮之 皇上將惟其言而聽之可乎否乎天下萬
世謂 皇上爲何如主哉 臣竊謂 皇上獨斷之明
雖不可無而從中之旨尤不可有此關於理亂安危
之幾匪細故也誠所謂始於微而成於著者也易曰

履霜堅冰至正此之謂耳矧四方災旱老稚流離啼
饑號寒之聲 皇上猶有未及聞者乎矧北虜驕橫
士卒困苦呻吟嗟怨之狀 皇上猶有未及聞者乎
引派臣寡嫠烝獨哀哀哭泣悲嗟之情 皇上猶有
未及聞者乎矧 宗室貧窮饔飧弗給愁苦涕洟之
態 皇上猶有未及聞者乎諸如此類左右不以聞
而以斃麟聞誠非忠於 皇上者也故臣願 皇上
之慎其所聞而進於其所未聞者誠以此夫所謂罷
黜獻者豈徒曰罷之云乎哉乃其心則不欲見者也

苟心欲見之則不可以言罷亦不可以言知臣嘗鏡
之古矣周武王却旅獒漢文帝却寶劔唐太宗却名
鷹此皆聖主賢君不以異物爲貴誠却之而不欲見
之者垂之後世遂爲美談 皇上德邁周武而陋漢
唐於不足爲者何爲旣知宜罷而復欲見之乎又嘗
鉅之今矣我 太祖皇帝於蘄州進竹簞則却之曰
恐天下聞風爭進奇巧令四方毋得妄有所獻太原
歲進蒲萄酒則曰朕飲酒不多自今令其勿進國家
以養民爲務豈可日腹累人 世宗皇帝卽位之初

珍禽奇獸一切縱放而淫巧異玩罔于嗜好是祖
宗之所以結人心凝天命以培千萬年不拔之基
者其好尚恒端舉動恒慎典則具存是固聖子神
孫所當服膺而遵承之者也皇上御極年來盛德
大業光昭祖宗今日爲一槁麟之故必欲一見令
撫按官上緊進來似此二祖之盛德不無少損乎
假使其麟至今尚存皇上必欲一見然產在遠方
臣猶以爲不可矧麟已斃多時其形枯槁不堪進於
丹陛之前亦明矣或者左右小臣以爲此希有之物

不可不見或誰以爲其麟尚存也遂鼓惑聖聽而必令撫按之進平撫按聞命旁皇無措則責之道府道府聞命旁皇無措則責之州縣州縣下吏旁皇無措又不知何如而後可應皇上之命也其中道途之費用解官之科索驛遞之騷擾恐又有不可堪言者當此物力凋疲之際軍民困苦之時兩河報災比他省尤甚皇上惓惓以軫恤小民爲念何苦爲此無益之舉動而勞民動衆爲也至於老稚啼號之聲十平呻吟之狀孤寡哭泣之情貧宗愁苦之態

皇上果欲見之否耶 皇上睿哲既知器瑞獻之爲
是此正杜將來貢獻之漸也今必欲一見而不盡罷
則傳之四方咸以爲斃麟且欲見之況生者乎況出
於斃麟之外者乎將來聞風而進獻者接踵至也書
之史冊寧不爲盛德一累哉昔舜造漆器諫者七人
夫漆器用物也造用物且諫則槁麟之取寧忍於不
諫耶 臣 雖不敢以舜臣自待而實不忍不以虞舜望
皇上也伏乞 皇上俯察 臣 言收回成命速爲停止
仍乞 皇上自今以往不邇聲色終惟其始不嗜玩

好久而勿替不聞亦式常存布衣祈禱之心不見是
圖永堅停燥減造之節移此念以接賢人君子則所
聞皆正言所見皆正行移此念以就日講經筵則所
聞皆帝典所見皆王謨至於內臣之語有益身心者
始聽之凡涉於嗜慾者必斥之一切從中傳奉
旨諭位加詳慎毋啓邪萌如是則皇上之盛德格天
駿業亘古不數年間必有麒麟遊苑鳳皇儀廷以應
聖明之瑞者矣

慎起居明詔旨以重祭典以光聖德疏

盧洪春

禮部主事
萬曆十四年十月

臣惟人君一身上而祖宗之血脉下而臣民之具
皆得此乎係焉非朝兢夕惕慎保此身則無以上慰
祖廟而下答輿情故出入起居無時無處必思以檢
束此心如履春冰如蹈虎尾置其身於無過之地卽
有一過又蹶然與天下共知之幡然與天下共改之
上不飾詞以愚下下不懷詐以欺上故君臣相得益
彰而太平之治斯以隆也臣伏睹陛下自九月

六以後連日 免朝竊嘆異謂 陛下方昧爽視朝
勵精伊始何以遽自廢意孟冬時享當必躬親至
二十日司禮監傳奉 聖諭朕前御門已於卯初起
矣一時頭暈眼黑力之不興也諭卿等暫免朝講數
日以爲靜攝服藥庶效近連服藥餌身體虛弱頭暈
夫止茲當孟冬享 太廟暫遣公文壁恭代其陪祀
官員俱加敬肅卿等可傳示彼知非朕政偷逸恐弗
成禮 臣愚捧讀不覺驚皇欲涕夫禮莫重於祭而疾
莫甚於虛易曰玉假有廟孔子曰氣血虛弱乃五勞

七傷所致肝虛則頭暈目眩腎虛則腰痛精泄此言

養之當慎也

臣

竊觀

陛下春秋鼎盛精神強固頭

暈眼黑等證皆非今日所宜有者不宜有而有之上

傷

聖母之心下駭臣下之聽而又因以廢宗廟

之大典

臣

未知

陛下之心何安也

陛下豈以遣

臣恭代爲不廢禮乎

臣

以爲

祖宗者

陛下之

祖宗也故王者必聚已之精神然後可以聚

祖考

之精神今身之弗親而徒委之疎賤之臣子則精神

意氣不相統攝即使陳遵設豆祇爲瀆而已矣

九

廟之神靈謂何而又何以報本追遠乎然臣所聞尚有異於此者先二十六日傳旨免朝卽聞人言藉藉謂陛下之意豈不謂馳馬試劍非盛德事不可以播告中外故設爲危亂令天下無議不知天下之病疾未有無因而致者卽如聖諭所謂頭暈眼黑力之不興豈聖體之固然抑驟感而致然乎其所以由來者漸矣效果如人言則偶以一時馳騁之樂而昧周身之防其爲患也淺果如聖諭則似以目前衽席之娛而忘保身之術其爲也深若乃爲

聖德之累則均焉而已此臣所以痛心焚首而不願
陛下有一於此者也且陛下毋謂深居九重九
有舉動外人無由知也夫鼓鐘於宮聲聞於外豈有
人主起居而寂然不聞於人者乎然而未有直言指
數以開導於陛下之前者是將順之道多而羣臣
之計過也陛下平日固已虛心受言然遇有贊頌
必多喜心遇有指斥必多怒心意亦謂偶然之失泯
於無言則事幾隱密人莫得而議其非形於臣救則
事跡彰聞人或指而議吾後故建言諸臣一涉宮

聞則天威震怒往往降黜以去也羣臣何爲不爭
相粉飾以成陛下純白之行而甘觸其所諱以蹈
不測之禍哉然而此羣臣之幸非主上之福也人主
之舉動近則天下視之遠則後世傳之誠於中必形
於外要有難於終掩者今日諸臣即使盡憚陛下
威嚴莫敢明目張膽以臣君過萬一有裨家野史
撥拾道聽私托筆札垂之後世陛下豈能盡禁之
而又何以自解乎故臣愚以爲陛下眞疾也則當
以宗社爲重毋務豫樂以基禍非疾也則當以詔

旨爲重毋務爲矯飾以起疑力制此心明示天下檢
飭於大廷廣衆而亦不放縱於深宮燕閒鋪張於詔
令詞章而亦不虧欠於躬行實踐矜持於公孤師保
而亦不假借於左右近幸抑制於章奏圖籍而亦不
背馳於聲色狗馬則聲足爲律身足爲度天下之廣
萬世之遠莫不聞風心服慕德無窮其與挾數用術
文過飾非以聾瞶天下之耳目者相去何如哉臣備
員郎署靡所短長緣職在俎豆微有感觸故不避鈇
鉞披陳肝膽觸冒忌諱儻荷 聖明垂鑒少賜省納

臣
卽損軀殞命有餘榮矣

恭陳四劄以裨端本防微疏

劉爲楫

刑科給事中
萬曆十七年六月

伏念

臣

以章句末學猥蒙聖恩拔置諫垣補闕拾

遺

臣

之職也抒忠報國臣之心也竊見近年以來四

方之水旱屢形窮簷之蓋藏甚匱軍有脫巾而呼盜
有荷戈而起亦可謂多故矣然猶不遽爲太平之累
而四海之治安於覆盂者則以陛下之精神完固
宮府一體內外一心是以雖有災變而國本不搖今
年自春徂夏聖體稍覺違和大小臣工未蒙聖諭見

朝講數輟天顏稀覩竊恐官府有異同之嫌內外有
睽違之迹精神命脉稍壅闕而不通卽天下之治忽
繫之故惓惓以朝講爲請至昨閣臣傳宣 聖諭朕
昨覽卿等所奏朕知道了朕意欲與卿等一見但朕
自前月服平肝清心之劑至今頭尚眩暈眼黑心滿
脇脹飲食少思寢不成寐身體尚軟朕豈敢以荒逸
怠厥志若朕疾少愈卽先出御門後聽講今諭卿等
知卿等可傳與諸司衙門務各盡心乃職不可因朕
疾久以廢政事欽此

臣捧誦綸音至再至四仰見

陛下保身之哲謙虛之度勵精之心自古帝王罕與
爲儷眞聰明聖主也而臣工以爲朝講倦勤亦可謂
不知陛下者矣今距聖諭傳宣之日又且旬餘
而朝講之期未有所定臣私憂過計意者聖躬猶未
甚平復也調攝之術或猶未有盡乎今夫士庶人值
父母有疾則憂心無所不至視藥視色晝夜靡寧必
期於愈而後已臣之事君猶子事父一念惓惓寧獨
異於憂親也臣謹條爲肆劄少效杞憂之愚惟陛下
下垂聽焉一劄曰聖躬之保護宜慎夫君身萬化之

原必勿搖其精勿勞其形然後此身強固而不至虧損顧人主深居法宮一切柔曼靡麗悅目娛心甚衆自非大智大勇鮮有不爲所動者儻一動於此致精神疲羸而又不能嚴加屏絕徒資藥餌以爲功亦何益矣臣伏覩聖諭云皆屬精神不足以致諸證俱作請自今獨坐靜思凡一切聲色嗜欲萬一有乘間而動者乎卽不能黜而不御但使御而有節則去其耗精神者而精神日就完固所以培養本原慰祖宗在天之靈答天下臣民之望端不外是伏望聖

明留意二劄曰內使之關防宜嚴夫今與陛下朝夕承意旨而奉奔走者非左右宦官哉其間固不乏忠謹之人然亦有便辟而好爲逢者有揚揚然招主之過以見親近以明得意者不可不察也臣每辰起趨朝見內臣或擁門而出或夾道而馳問之皆各監散官也不則掌印內臣名下小官也臣訪此輩所談吐類皆宮禁之事率口曉曉無復顧忌甚非所以嚴宮闈而肅聽覩也臣願陛下自今特勅諸監掌印監官倍加約束并勅皇城四門司鑰內臣嚴加防

範務使裏言不出外議不生此亦防內使洩露之微
去間去疑之一道也伏望 聖明留意三劄曰諸司
之章奏宜覈夫章疏之達於上或言主德或言儲貳
或言時政或言人品雖言人人殊而其心無非欲效
忠於 陛下 陛下御極以來凡諸司章疏內閣專
一擬旨司禮監專一進奏雖逾耳批鱗刻日卽下無
有纖毫壅蔽於其間者竊見近日建白多寢不報昨
諸臣以稽查請亦皆留中不宣 上愚私心揣度意必
陛下時方靜攝不遑睿覽暫爾稽遲未至蒙蔽而大

小臣工則甚有抱隱憂爲不必然之慮者誠恐小人乘機肆爲欺罔或事關國體有彈及大奸邪言及大利害者公然隱匿內閣不得票擬六科不得封駁宮府異同內外睽違莫此爲甚臣願陛下特勅文書房凡有章疏卽按會極門首奏目一一進覽勿得過三日更乞勅令科臣二員每日赴會極門會同司禮監官收接一應章疏紀其數目以備稽查此亦防章疏壅蔽之微疏通血脉內外交孚之一道也伏望聖明留意四劄曰法令之督責宜信臣聞京邑爲四

方之極故法令行必自近始乃今一切禁諭且有格而不行者矣卽如都御史吳時來等見俗尚侈靡無節欲一大振刷先從其冠服制度之細者微者黎然舉正起弊維風之意甚善奈何憲約刻頒竟爲故紙五城曉諭輕向弁髦夫此其小者而猶格不行若是則何敢令四方聞且見也臣聞上有紀綱下有法守然後心志齊一而無泮渙之虞未見玩法而可與爲治者也臣願陛下更勅五城御史申飭憲度一法之立堅如金石一令之行信如四時勿徒觀爲故事

此亦防紀綱陵替之微風示四方之一道也伏望
聖明留意已上四劄總無深識遠覽何能裨益宸聰
但臣一念朴忠真見端本防微今日所宜亟講無過
於是若夫朝講之當勤也召對之當復也聖諭已明
羣臣少愈卽出臣何敢復贅陛下儻過聽芻蕘俯
賜採納臣卽伏就斧鉞亦有餘榮矣

恭進四箴疏

維于仁

大理寺評事
萬曆十七年十二月

臣性慇愚筮仕縣令特厭薄時套不肯詭隨人常以
病請休致於撫按不准旣而叨轉京官臣意在恬退
矣臣父迫之使就職臣思人不仕則已仕則當匡正
其君臣如京閱歲餘僅朝見於皇上者三此外惟
見經年火動常日體輒聖政久廢而不親聖學久輟
而不講臣以是知皇上之恙醫術難明藥餌難攻
者也惟臣之四箴可以療病請敬陳之皇上之恙

病在酒色財氣者也夫縱酒則潰胃好色則耗精貪利則亂神尙氣則損肝以皇上八珍在御宜思德將無醉也夫何醲味是耽晝飲不足繼之長夜甚則沉醉之後持刀舞劒舉動不安此其病在嗜酒者也以皇上妃嬪在側宜思戒之在色也夫何幸十俊以開驕門寵鄭妃冊封徧加卽王妃有育皇家嗣之功不得并封甚則溺愛鄭妃而惟言是從儲位應建而久不建此其病在戀色者也以皇上富有四海宜思慎乃儉德也夫何取銀兩動支幾十萬索潞

紬至幾千疋畧不知節慎甚則拷宦官得銀則喜無銀則不喜李沂之言爲不誣若使無賄皇上何痛絕忠良而優容讒佞況沂之瘡夷未平而鯨憑神錢復入雖皇上無以自解何以信天下而服沂之心耶此其病在貪財者也以皇上不怒而威宜思有忿速懲也夫何今日杖宮女矣明日杖宦官矣彼誠有罪置以法律責之逐之可也不必杖之累百而不計其數竟使斃於杖下此輩密邇聖躬使其死不當罪恐激他變甚則宿怨藏怒於直臣范儁姜應麟孫

如法俾幽滯於林下拘禁於散局抱屈而不伸此其
病在尙氣者也夫君猶表也表端則影正君猶源也
源潔則流清 皇上誠嗜酒矣何以禁臣下之宴會
皇上誠戀色矣何以禁臣下之淫蕩 皇上誠貪財
矣何以懲臣下之饕餮 皇上誠尙氣矣何以勸臣
下之和衷四者之病纏繞於心係累其身聖恙何時
而可也 皇上春秋鼎盛之時經年不朝過此以後
之年當何如耶今春會試場輔臣出論題聖賢所以
盡其性是默指 皇上好貨好色但其指引而未發

恐皇上之未悟也

臣

特撰四箴以進之但

臣

之說

途耳之言格心老論對症之藥石也倘蒙俞允出御
便殿多接正人遠彼宮妾除此四累以靜攝不踰半
年而聖體必強壯康豫如其不然愿碎臣之首設若
護疾忌醫不以臣爲訕謗則必爲干名爲出位訕謗
非臣所敢也臣犯顏而諫且不計死所干名何爲若
爲出位沽名設訕謗之木干道路且求言於士庶沈
有官乎求言而不可得專設諫官使不得不言非諫
官之外可禁箝天下之口而使不事言也近見科臣

李春開所奏之事自有朝廷處分官守言責爲說是
阻塞言路言路不開國家遇有大事人所不敢言者
科道將曰吾輩不言他人言之其有愧於言責多矣
若箝人使不言彼將曰吾輩不言天下莫敢言者但
舉刺人才條陳世務求無利害足矣若有禍於已而
有裨於君皆避而不言胥天下而以言爲諱此說倡
也豈祖宗之福乎聖疾踰年若使有言及病根
皇上可望改省聖恙可痊期臣可默然臣見年今言
者未及病根醫者未曾收功臣世沐聖恩縱冒出位

之嫌不容塞咽結舌已也孟軻氏論國君有取於法
家拂士今觀鄒元標正折檻引裾之傳批鱗補闕之
拂士也皇上置而不用臣有以將其心矣蓋元標
一仕必首言聖躬次及左右是明知其賢忠而不用
也豈知直臣不便於皇上及左右深有利於社稷
宗廟者也上旣忌言不必諱言其望拜昌言之世遠
矣矧當今之時何時也劉汝國之寇雖云暫平南直
湖廣江之東西荒旱爲極哨聚可慮且遼夷犯邊雲
南鄖陽甘肅等處軍士動則鼓譟而難制此有識者

寒心而衣袷之戒誠不可不豫若 皇上勵精圖政
引用正直可以潛不軌者之異志苟如今日宴溺荒
淫使豪傑解體將禍生不測況奏瀆多留中不出抑
不知爲酒色財氣迷而不發乎或出納之際有未明
乎倘遇軍國大事憑何奉行究其流弊不止誤事將
使國脉壅而不通害可言哉 皇上之溺好四者不
曰握生殺刑罰之權人咸畏之而不敢言居深邃密
禁之地人莫之知而不志言不知言鼓鐘於宮聲聞
於外幽獨之中十目所視十手所指可曰莫可觀也

而遂不檢乎權但可以傾保祿全軀之士而懷忠肝
義膽者寧爲玉碎不爲瓦全卽鼎鑊在前斧鑕在後
亦所不顧也四勿之箴臣一得之忠悃伏望采納
置之御座庶可以廖聖躬光聖德宗社幸甚天下幸
甚卽臣以冒死之罪臣雖死之日猶生之年臣當視
死如歸含笑遊九原矣敬將四箴開列于後戒酒箴
曰酖彼麴蘖昕夕不輟心志內慢威儀外缺神禹疏
狄夏治興隆晉武銜杯糟丘成風進藥陛下醲醑
勿崇戒色箴曰豔彼姝冶食息在側啓寵納侮爭妍

悞國成湯不邇享有遐壽漢成暱姬歷年不久進藥
陛下內嬖勿厚戒財箴曰競彼鏐鏐錙銖不剩公帑
稱羸私家塵甑武散鹿臺八百歸心隋煬剝利天命
難誑進藥 陛下貨賂勿侵戒氣箴曰逞彼忿怒恣
睢任情法尙操切政盤公平虞舜溫恭和以致祥秦
皇暴戾羣慙孔彰進藥 陛下舊怨勿藏

靳望

聖明克孝克慈克敬克仁克宏雅度以茂聖德疏

張

濤

工科給事中

萬曆二十一年

月

臣惟

皇上藝倫敦叙孝慈業篤於宮庭勤恤誠祈仁敬夙
昭於上下天地存心包荒爲度二十二年而來

聖祖神宗之理集成顯赫茂以加矣而臣猶謬爲陳
說溷瀆天聽毋亦責難陳善意乎何言克孝則

皇止爲人子之道也蓋爲天子母則必宜以天下祝

乃者

慈聖皇太后壽辰

皇上愛根天性禮備常儀臨朝受賀道路懽誦計今
仁聖皇太后頃亦當辰矣儼駕翠輦萃嵩祝將兩
宮胥慶觀聽允諧也苟或忽爲彌文萬一當期不出
聖母春秋漸高之日宮闈獨處之中所盼望于

皇上者何殷而

皇上將何繇以聚順而慰悅之也朝省暮定原非過
勤歲行一祝尚屬疏節臣故願

皇上祝 仁聖如

慈聖而全其一體之至情也何言克慈則

皇上爲人父之道也惟愛子而知勞故擇師爲瞻式
皇上重視洪緒獨運睿謨特令

元子蚤就教諭 九廟用懌群疑頓消道何容贅唯
是宮僚關係不逮得人則善匪人可虞昔在

世廟選擬失精卒致科臣周琬有言嚮非輒聽更定
則黃易費案李廷相等居然在列矣頃知

皇上加意慎揀必無前誤但一朝衍講不過具文而

人品不與二三閣部不無獨信而公評未悉况館誼
相礙愛既難化取舍既異缺望易生以臣度之不如
集輿論於會推而俾尤卿科道僉舉其尤之爲得也
臣願皇上必重講讀以重元子而務得端方正
直之士行其養蒙聖功之愛也何言克敬則

皇上主天地宗廟之道也蓋明禋而恤祀必如在以
告虔乃者皇上經年遠處屢遣代祭神祇宗祖豈
肯格歆妖星垂警淫雨祥災揆厥所由殆非虛致頃
又風日爭明見於元旦變履不息省念宜殷夫日掌

陽何故陰霾爲蔽日又君象何爲歲朝難覲靜言思
之實大可畏繼今朝日夕月繼今饗廟郊天臣願

皇上齋戒如期執灌無數也何言克仁則我

皇上惠鮮億兆生民之道也古者饑溺由已痼瘼在
身每爲春和議賑而且以矯詔發粟聽之吏也目今
汝洛徐淮流離困苦其情狀有不忍言者大畧科臣
王德完等按臣陳登雲等各疏亦概具矣我

皇上不急之供及急可念之灾罔念將恐溝壑餘生
鳩劫狂逞其恐予遣旣盡邦本何歸臣竊腐心計無

所出度必特勅撫按廉遣該省司道督同該省有司
單騎出郊望屋察饑酌查該省府州縣庫儲贖稅等
銀聽其便宜分賑不必詳請延遲惟與有司公同註
冊以便稽考以埃補銷斯須殘喘乃庶有療司道儻
盛驩從有司儻繁供億是謂不職撫按得而問之全
活不效風聞者亦皆得而並問之故臣獨重賑救之
人蓋謂有人則設法區處盡心散給不患終無奇策
矣臣願 皇上勿以數郡生民任其相食而愛一勅
諭使災傷地方不蒙得人之仁而飲曠蕩之澤也何

言雅度則我

皇上翕受併包之道也古者聖君御臣有責讓而無
忿疾有譴謫而無錮禁是故青可原過可使耳往日
科臣李獻可等請瀆過激部臣孟化鯉等調停未預
致干天怒忠而被放迨閣臣疏及泰交有云或屢推
而未報或一斥而不復

朝廷旣不得真材之用而天下且得借爲議論之端
當蒙

皇上轉圜嘉納肯下部院悉心確議着實舉行宜乎

凡有錄用必無拂抑乃今困於龕巖者尤多叙在牘
劄者尚阻反令閣臣蒙疑而疚心部臣惜材而掣肘
是皇上所謂着實舉行者茲且不必着實乎或亦
皇上且謂褫職奪官由我作威振滯賜環憑誰作福
乎以是爲疑莫若明勅吏部盡將先後逐降諸臣稽
詢公私分別材品遇有相應員缺明白疏請得可後
已偶不蒙允積誠再請即如趙普之數四補牘不得
爲瀆也如是則

皇上昔日之威明爲今日之福操柄有在更何朦朧

不過惜

皇上之人材以分

皇上之猷念臣不願

皇上終忍視國家之空虛久令政事之不競而不獨

爲棄臣乞還一官也臣資望淺輕啓聒深切厭薄唾

棄窺有密意詹詹款款祇增惶恐顧此等道理此等

舉動上係聖德懋勗則德崇近播令聞遠光冊史玩

忽則德損巷有異議史鮮徽稱臣爲

皇上陳牾爲

皇上大懼也不然而何以立於天地父母君臣之間
也伏乞銳自爲計

留神鑒納設誠施行幸甚臣不勝翹跼竦息虔切待
命之至

省發章奏以圖幾康以弘聽納疏

林材

吏科都給事中

萬曆三十二年八月

臣聞古者天子聽政使公卿至於列士士獻詩瞽獻
頌史獻書百工諫庶人傳語近臣進規兼聽竝觀治
之所由盛也自漢以來始置言官夫以四海之利病
得失萃於一官使言之卽上焉者聞道而求諫用其
言而顯其身士猶恐懼不敢自盡者況於厭聞其言
深疑其黨又誰肯撓徑尺之鱗而犯九重之怒哉惟
我皇上臨御以來宵衣旰食納諫求言天變屢見

則儆戒常申水旱頻仍則賑恤屢下顧宇內猶多怨
咨之氣朝端尙乏喜起之風者此何以故則以上下
之情未孚而聽納之量未廣也夫國家設立六科封
駁所寄都察院十三道御史糾察攸司但其心勤獻
曝而勢隔排雲故發奸摘伏獨籍袖中之彈文而補
闕拾遺須殿上之札子是光明之所以下濟忠讜之
所以上聞者凡以章奏之無壅耳惟數月以來封事
半閣奏牘多虛雖纖塵涓滴未必皆補於高深而葵
藿芻蕘亦有關於獻納臣不敢槩舉如近日科臣

耿隨龍包見捷孫羽侯田大益黎道炤等道臣甘士
价許聞造等憂時竭智觸事陳言率皆遲留久未允
發甚至於臺省乏人需在旦夕而都御史孫丕揚偕
臣兩疏以請俱不蒙賜允夫是數者言雖不能盡同
而意則各有攸當蓋用入行政指以爲謬則無關於
齒馬之嫌而民變夷情見以爲憂又何涉於投鼠之
忌乃聖心洞照非不與日月竝明而聖斷久稽終不
與江河同決者臣則有莫測其故矣如謂其言之偶
合者而疑其同謀歟則詢謀僉同鬼神其依大舜之

所以咨禹也。如謂其見之相同者而疑其朋黨歟。則人之過也。各於其黨。又孔子所以知仁也。夫朋黨之說。自古有之。惟辨其爲君子小人而已。故宋臣歐陽修曰。君子以同道爲朋。小人以同利爲朋。爲人君者。但當退小人之僞朋。用君子之真朋。則天下治矣。堯之時。元凱十六人爲一朋。舜之時。臯陶稷契二十二。人爲一朋。周之時。太公望散宜生三十人爲一朋。而聲施至今。鴻名與天壤共敝。獨漢唐宋之世。黨禁屢起。而周福侯覽朱全忠蔡京賈似道輩。輒欺其君而

燭和之遂使正人盡逐美業鮮終書之史冊至今扼腕治亂興衰之迹此真非萬世之炯鑒哉臣等固願皇上建韜設鐸明目達聰廓衆正之門杜羣枉之路索比周之辯消朋黨之疑惇德允元推誠待下視四海如一家視羣臣如一體念閣部者爲皇上股肱又念科道者爲皇上耳目股肱司其運用耳目稟其虛明勢本相須用實相濟使視聽少有未真則動作必多逾節若耳目至於蔽塞則股肱盡屬駢枝由斯以談何容廢缺伏望皇上於一切章奏早賜批

發卽其中言有過戇者則狂瞽諒其可矜設有當從
者則管蒯亦爲不棄悉下部覆審酌量施行則嘉言
罔伏不獨止輦之休風再見於今而一日萬一大奸
巨慝爲世之所不敢言者亦莫不願進於闕下而
伸其詞說矣一社稷無疆之福端在於此臣愚不勝
冒昧悚息待命之至

朝講久虛直臣久廢及時修舉以光聖德疏

謝廷策

浙江道監察御史
萬曆二十三年五月

臣於春二月內行取抵京接邸報見大學士陳于陞
一本爲恭效愚衷披陳時政之要懇乞聖明采納
以光治理事首稱接見大臣錄用人才爲言甚悉奉
聖旨覽卿奏具見愛君忠猷謀國遠慮關朕躬及錄
用人才的狀已知道了其餘着該部看了來說欽此
舉朝大小臣工莫不鼓舞懽忻誦皇上有從諫之
明又莫不翹首頓膝而望皇上旦暮行之以爲太

平美政何今時已滿日月矣而一朝廷之期竟未一出以言得罪之臣亦未聞有一憐而錄之者臣愚不勝大惑孔子論聽言之道曰法語之言能無從乎改之爲貴異語之言能無悅乎繹之爲貴輔臣于陛之疏豈不稱法異兩備哉 皇上諒其爲愛君獎其爲忠猷又諭之以知道亦可謂從而悅之矣獨計所謂知道者非徒知之而已也知其言爲忠愛而不用其言以行在 皇上不得受其言之益在輔臣不得盡其忠之志在天下後世不得以爲法而不釋而議其後

謂聖德何謂聖名何臣願皇上熟思而急圖之也敢以往事爲證可乎臣聞周宣王嘗宴起姜后脫簪珥待罪於永巷使其傅毋通言於王曰樂色而忘德失禮而晏起亂之興自婢子始敢請罪王自是勤於視朝後世稱焉 皇上御極視周宣王何如也聰明睿智其過之也遠甚勵精圖治其過之也亦遠甚惟靜攝以來朝講中輟輔臣至於終歲不能一再覲天顏而奉清問竊恐宮府漸隔而煬竈之患隨之矣皇上誠繹輔臣之言慨然申定朝覲規或朔望之必

出或祭告之必親時召大臣商確政務卽不能復常
朝之規而一月再臨亦不爲數卽不能復日講之舊
而便殿賜問亦不爲勞君臣意氣洽於泰交國是紛
紜定於面決萬代瞻仰在此一舉天下後世將咏誦
聖天子之舉動於不朽而周王何敢望下風也臣又
聞宋仁宗時唐介吳充呂景吳中復蔡襄吳奎韓絳
等數十人皆以直言謫外殿中待御史趙抃進言曰
近日正人端士紛紛引去者以正色立朝不能諂事
權要傷逆者衆耳仁宗允其言諸臣悉令召還由是

嘉祐之治有聲宋室榮華至今 皇上御極視宋仁
宗何如也文武聖神其過之也遠甚君子滿朝其過
之也亦遠甚惟邇年以來諸臣任事過銳進言過激
直遂慙愚不能無罪 皇上震怒杖責貶削前後百
十餘人此百十餘人者品格未必相同皆以氣節名
世儻一槩錮之終身是明予諸臣以名而暗貶國家
以失人之害非便計也 皇上誠繹輔臣之言慨然
勅下吏部查諸臣中言雖過激而心則無他者幾人
事雖執拘而心本爲公者幾人各疏名上請斷自

聖裁卽未必盡行召還或特爲簡拔以完其用亦未必盡復原職或別行推補以盡其才用不測之威以懲創於前又用不測之恩以甄別於後顛倒豪傑莫知端倪天下後世行將宣揚大聖人之作用於不窮而宋仁宗何能彷彿萬一也此二事者諸臣言之多留中不報報輒忿怒輔臣言之幸蒙嘉納納之又未慨行此臣之所不勝欸欸之愚爲 皇上再言之也臣初試爲御史豈不知苟祿可以容身當國家多事之時又豈不能彈摘示以寒責惟君德爲萬化之

原而人才修社稷之計時方修正史以信萬世而
皇上之注念誠爲又皇上之令聞永譽所係臣何
忍以二事坐聽流播四方傳宣來祺爲聖德累爲令
名損哉此臣之所以爲皇上丁寧之也儻蒙聖
明采納施行太平無疆之福端在是矣

懇請攀送梓宮以光聖德疏

王就學

吏部主事
萬曆二十四年二月

臣恭遇聖母之喪而因思聖母當年所爲相我
皇考以成祖宗數百年之統者雞鳴脫簪不啻勤
矣所爲育我皇上以承皇考千萬年之緒者撫
摩鞠育不啻勞矣不幸一旦上賓固知祖宗在天
有靈必爲震動皇考升遐未久必爲痛悼而我
皇上孝思純篤當此大故哀痛迫切當必有萬倍恒
情者但聖母之音容不可復卽猶幸而可以憑棺

痛踊而舉期在此一刻則憑棺痛踊而爲祖宗重

冢婦爲皇考惜賢助爲聖躬自報鞠育之恩者亦

惟此一刻皇上於此不知宜何如爲情也乃今以

聖躬違和遣官代送臣聞之不勝痛心不勝栗股臣

思祖孝安皇太后者皇上之身所自育也皇上

之身皆皇太后之遺則凡可以報皇太后之恩

者何可復自顧其身自古聖人論子道而以不愛髮

膚垂戒論喪禮而以形毀骨立示訓非無見也今

聖體違和或亦哀毀所致而獨斬一板送之禮以致

聖孝不終豈獨非古禮卽聖心亦豈能自安耶嘗
讀毛詩蓼莪之篇有曰哀哀父母生我劬勞又曰欲
報之德昊天罔極是父母之恩方痛欲報無從也顧
得報而不報耶且於此不用其情烏乎用其情於此
可忍烏乎不可忍臣恐難以形諸詔諭書諸簡冊而
傳示天下萬世也伏惟 皇上收回成命力疾一出
而朝祖遺奠諸禮一一躬親勿令非類者代而使
聖母上賓之靈不至於無依則三祖列宗與我 皇
考之心必且罔怨罔恫而百官萬民亦且翕然觀禮

而合天下以成其孝天地綱常聖賢彝訓皆藉此一
舉不泯矣臣情迫詞短冒死生言不勝哀懇之至

披瀝赤心恭請篤厚中宮以光聖德疏

王德完

工科都給事中
萬曆二十八年十月

臣惟大學論治國平天下必始於齊家班固以夫婦之際爲人道之大端庄衡以妃匹爲民之始萬福之原皆至論也故天子之與后猶天之與地日之與月陽之與陰父之與母也地與天竝位天不交地則乾坤毀矣月與日竝明日不麗月則晝夜息矣陰與陽竝行陽不順陰則寒暑愆矣母與父竝配父不顧母則家道索矣今皇上萬國之父也中宮萬國之

母也 皇上聰明太縱仁愛性生其眷禮 中宮夙

稱優渥乃臣自入京數月以來道路喧傳咸謂

宮役使止得數人憂鬱數親藥餌且貽危不自保臣

驚惶痛惋不勝宮禁深嚴虛實未審臣卽愚昧竊知

其不然第臺諫之官職得以風聞言事果 中宮之

不得於 皇上萬一有憂鬱歟則子於父母之怒猶

得以號泣幾諫矧 中宮爲萬國母安得隱忍不言

以傷教義倫果 皇上之眷顧 中宮有加無替歟

乎於父母之謗其得昭雪辯明矧 皇上爲萬國父

安得蒙蔽不言以虧損盛德兩者躊躇無一而可歎
日間食不下咽寢不帖席蓋天地陰陽之大變宗廟
社稷之隱憂滿朝大小臣工無一人不聞無一人不
駭而無一人敢言蓋以全軀自保與忠君愛國之念
交相戰而不自勝也臣厓廩之骨不足以嘗捶楚枯
朽之棟不足以當雷霆然所恃者高皇帝在天之
靈且美漢史表盜卻坐事耳太祖高皇帝冊立
皇后冊曰天眷我明啓運興王爲君爲后可不慎歟
君以仁政慎於治外撫黎庶而統萬邦后以懿德慎

於治內表六宮而母天下長久之道也欽此臣以長
久之道爲皇上披陳卽惟鈇鉞之誅亦可見太
祖高皇帝於地下矣漢史載漢文帝所幸慎夫人在
禁中嘗與皇后同席坐及幸上林布席袁盎引卻
慎夫人夫人怒文帝亦怒盎因前說曰臣聞尊卑有
序則上下和今已立后夫人豈可與同席哉且上陛
下獨不見人戴平漢文悅語慎夫人賜盎金五十斤
臣跌蹶不得出入禁中何敢比袁盎之卻坐然得致
皇上眷顧中宮止輦虛受媿美漢文卽死且不復

臣不識忌諱冒犯天威不任席藁戰兢待命之至

仰繹君臣一體之旨併陳大義以成泰交疏

馮琦

吏部侍郎
萬曆二十八年

比因戶部以錢糧不支具疏上請奉旨寬限解進以彰君臣一體之意臣工祇誦明綸無不感慰竊惟君臣之分等於天地天地亢則成旱君臣激則成睽比者久旱之餘勿霑微雨久隔之後乍奉溫言此天人之機相應而君臣之情將通也臣等敢不自省自責以求附於一體之誼伏惟皇上初政誠心以任大僚虛心以延讜論何嘗持不斷之意積不報之愼哉

所以致此諸臣有不能辭其咎者公卿大臣平日受
高爵厚祿不能積至誠以感格君父其咎一臨事氣
欠和平詞多枝蔓不能納約自牖以開悟君父其咎
二謀身急於奉公徇人多於徇國任德不肯任怨務
名不肯務實情狀如此何以取信於君父其咎三小
臣惟恐大臣有權大臣惟恐小臣有言以致職掌與
議論兩輕大臣與小臣兩絀相忌相傾互事互敗何
以取重於君父其咎四懷顧忌則自甘於不言窺機
竅則自附於敢言事事類於寒蟬旣虧風節人人託

於鳴鳳亦涉雷同迹已相符語又近瀆安得不取厭
於君父其咎五以外廷而測中禁聞未必真以平世
而談危亡事未遽驗一言不真則疑羣言皆妄一事
未驗則疑諸事皆虛事未快於心言多逾於耳安得
不取忤於君父其咎六以此責諸臣罪固無詞然其
咎難諉而其心亦有可原者皇上但見前後相舛
上下相左若有意於爲欺爲抗遂欲極力以裁抑之
始而惡妄言已而惡直言久之言皆不入矣始而點
陪推已而命別推久之人多不用矣臣觀皇上初

政原如彼則 皇上初心不如此上心不欲爲此而
爲羣臣所激以至此下之罪也上偶爾一爲之而羣
臣所激遂至堅持不肯自還亦下之罪也總之羣臣
望 皇上太高持之太急 皇上視羣臣太輕視天
下事太易羣臣伎倆才品與夫相排相詆之狀皆積
爲 皇上所窺而 皇上用舍舉錯一切務爲不可
窺測於是上下不相信之形成矣下程不可信之形
以事上而上疑上懷不肯信之心以待下而下亦疑
久之上下之情澹然漠然不復相法臣請以君臣之

真情言之人臣任事進言皆職也任而精神注於事
中言而忠誠溢於言外非出於不得然而出於不
忍不然者情也人君用人亦須有一段真誠相倚相
信更無疑忌鄙薄之意參乎其間方其用也情在委
任及其退也情在體悉今羣臣自反所以事皇上
與皇上所以待臣子者其情何如哉夫人主一人也
而羣臣至衆譬之山之高者其峰必孤必衆土衆石
環相擁附而後其勢尊其基固今羣臣日渙散於下
而明主日孤立於上如不操之舟久而孔隙日開如

不張之弓久而筋膠漸解萬一有危疑難處之事誰
與謀之隱微難暴之衷誰與明之近年召對旣少朝
講久虛羣臣相通惟有章疏之一線而章疏又多不
報卽使事至上前毫無中格而明主意指何由下宣
一疏遲一事悞矣一官缺一事廢矣積少則多積小
則大不知所悞者人主之事歟人臣之事歟自古稱
其朝君臣相得人才衆多以爲其國榮其朝君臣隔
絕人才衰之以爲其國辱今舉天下而無一可用之
言無一可重之臣諸臣之處於京國如寄耳數年之

後且老且去烟散雲消而明主獨存青史書之曰萬
曆中君臣隔絕如此人才衰乏如此是名也人主當
之歟人臣當之歟且夫綜覈者國家之大利而偷安
者人臣之所甚便也綜覈者利在速決偷安者利在
不斷今章奏留中推舉不報人臣職業得以推諉朝
廷功罪無所責成是與人臣以偷安之便而國家反
不得收綜覈之利故今日爲庸臣甚易而忠臣甚難
爲塞責之忠臣甚易爲濟事之忠臣甚難自古人主
未有不愛惜忠臣之理第所以效忠者誠不足而慙

有餘矯枉過正以自離於君又遂疑天下士大夫不
爲已用而久之亦遂以爲無足用耳臣願羣臣退而
自反也欲效忠謨本爲國事何爲上下相激反致齟
齬亦願皇上深思羣臣之言自是朝廷事耳一時
意見不到何足久置於懷何苦以朝廷之事與臣下
爲懟念及於此則臣下之論自平而君父之氣亦平
矣伏望皇上沛然下明詔示羣臣以用言用人之
本心責以不能盡心盡職之明效盡赦前日微忤小
過以與羣臣更始臣亦洗濯其心以奉皇上君臣

同心一以修明政事爲主夫使臣子之心同注於朝廷則自然不爭君臣之心同注於政事則自然不隔如進一言務在實理實事實情實語以聞於上其當也願皇上嘉納之其不當也願皇上明訓之如用一人務在論資論俸論才論品以請於上其當也願皇上點用之其不當願皇上明示之盡剖疑障洞披肝膽君臣上下永無嫌猜明如日月之無私信若潮汐之有準朝廷氣象自是精明天下人心誰不震懾以皇上神聖爲此不難願直恐不爲耳臣

等職統百僚百僚之罪皆在

臣

等之罪自省自責無

以自容一念赤心惟欲爲陛下復完上下之交以

成一體之誼而已惟

陛下憐其意而留神采納焉

敬陳格心要論以效約牖愚忠疏

吳達可

河南道監察御史
萬曆二十八年

臣聞王者奉天而順時故孟春之月帝出於震震爲
長男蓋皇儲之位也乘春舉行示天下以主器宜重
之意也天子命相布德和令命有司發倉廩賑乏絕
出幣帛禮賢者示天下以施祿及下之意也適人以
木鐸徇於路官師相規工執藝事以諫示天下以集
思廣益之意也蓋陽春伊始政令宜新人君法天地
之和崇長養之德類如是臣近覩綸音善念森發真

如方春氣未闋萬象生機勃不可遏者夫陳善閉邪臣
子分誼況君有善念而不能開陳承順以效納約自
牖之義如糾繩之責何臣忝列言官不忍默默敬以
皇上善念所宜允者列爲格心要論願返觀而採擇
焉伏讀聖諭有云皇長子喜事臨近又云典禮在邇
是心何心也父子至情發於天性而不容已者也善
念也顧冊立加冠必在履端之始而大婚嘉禮尤宜
桃夭之時今禮臣言之臺省諸臣言之府部大小臣
工合詞以請未蒙批發豈俟咽喉之落成乎春和嚴

督工倂立可就緒必待珠寶之取盈乎少示節省儉
德正足貽謀是在之皇上一睿斷間而大信克全典
禮肇行矣斯舉也所當充廣愛予之善念行春令而
象天之出震者也伏讀聖諭有云政本重地豈可久
缺便着該部會同九卿科道掌臬官通將前後所推
閣員在任在籍素有本望者勿拘員數以彰朝廷博
採求賢之意是忝何慰也君臣大義出於由衷而不
可解者也善念也顧精神簡注即夢卜可以求賢意
見轉猜即博訪終屬空套今部院九卿科道諸臣從

公會舉列名上請者至再且二未蒙欽點豈以元輔
尚可供職乎亮正熙載必非偃臥者所宜居豈以次
輔可以專責乎重務煩機亦非獨力者所能任是在
皇上一簡閱問而旨鼎有光凝丞有賴矣斯舉也所
當克廣禮臣之善念行春令而象天之交泰者也伏
讀聖諭有云行取科道候旨逾時朕已知道了是心
何心也求言納諫之真心也善念也而遲疑未決明
旨尚羈豈以新進之輩類多浮薄之儔而厭惡於既
選之後孰若懋遷於未選之先乎詎以爲取剏推寤

知縣皆遴選於千百之中而積俸博士中行又品隲
於輦轂之下其終老成端亮曉知治體者未可謂盡
無其人也 皇上何必過疑而摧挫之也伏乞勅下
部院及時考選以撫按之官評叅之舉朝之公論必
得正直練達者以充其任而浮沉躁率輩不得濫廁
其間將見臺省有人聰明四達斯舉也所當充廣聽
納之善念行春令而象天之咸虛者也伏讀聖諭有
云朝廷礦稅原爲裕國愛民不許擾害地方不許重
徵疊收三語叮嚀三令五申是心何心也爲國爲民

之真心也善念也而中使未徹羣黨縱橫豈不以撫
按之徵收終不免於怠緩不若此輩專奉勅諭可以
殫心經畫乎臣以爲憲臣酌量於內外之供其聞見
最真而有司調劑於上下之間其爲力甚便 皇上
必欲取商賈之資以厚內帑之積縱不敢望礦稅盡
停第責成撫按徵解足額誰不奉行惟謹何必貂璫
是憑任其威福舉憲體而弁髦之也伏乞蚤渙綸音
撤回中使而以礦稅應徵解者歲命地方官如期
以進庶羣奸不擾而國課常盈斯舉也所當克廣仁

愛之善念行春令而象天之損益者也昔宋臣程顥
爲監察御史裏行惟務以誠意感悟上心韓琦居諫
垣時所言顧體酌宜主於理勝而以至誠將之上可
其秦十之八九夫宋之神宗不過中材之主二臣所
遭猶得諫行其志我皇上英明天授稟有堯舜之
資今三陽開泰聖念日新臣何敢不以轉圜之美望
其君而自處於二臣之下乎謹以時政之最要者著
爲格心之論激切上聞惟冀皇上虛懷而賜納焉
下情不任悚息待命之至

體天道宜元氣以暢皇仁疏

宋燾

巡按直隸監察御史
萬曆三十四年二月

臣一介草茅荷蒙皇上厚恩育之秘館廁之柱下
損糜圖報之恩永矢於寸心比值元旦之期望闕焚
香叩頭祝聖壽於萬萬年臣書生也誦詩讀書訓詁
之外一無所知復思每歲孟春適人以木鐸徇於路
官師相規工執藝事以諫自古記之矣工藝當此時
尚不容緘默以負國恩況臣言官也千慮一得願比
於芹曝之獻惟聖明電察焉夫時行春令天地閉

結之氣於此融通民物陰鬱之思於此舒暢草木翕聚之脉於此發榮皇上如天運於上無怠無荒體乾健於不息而輔臣朱賡職司燮理襄贊天工不進於拜謚颺言之盛不也有不容泄泄爲者書稱元首之明未已也而繼之以起哉起者奮然興起之謂也念天心可格民心可畏防之又防惕乎其惕昧與視朝日夕勤政蓋時幾以勅天耳書稱股肱之良未已也而繼之以喜哉喜者踴躍任事之謂也伎倆強云盡融矣而庶官庶事之廢弛難曰秦越其肥瘠聲色

雖曰不動矣而任疑恤民之籌畫難曰玩揭於日時
有臯陶之邁種則可無鎮雅之名有姬旦之吐握則
可無伴食之誚故熙載而先之乎奮庸彼斷斷休休
必合之於有技彥聖之好而始真否則模稜觀望者
臣因之以借口矣至於百工之熙熙者廣也師師濟
濟布列庶位故分曹而奏合之共亮乎天工大僚多
缺員無問百工矣百職若晨星無問能廣矣邇已能
乎遠已柔乎食哉惟時乎今禁城以內商人行戶蕩
產破家妻離子散楊致中之虐焰方熾而殺人命如

草菅而不問十室死空街哭巾怨潰敗之形正如癰
之未破水之未決且不知所底止而四夷有輕中國
之心乃四方水旱蝗蝻道殣相望民不聊生或枵腹
而斃或併日而炊茹草根啗樹皮一室也而女泣兒
啼一衣也而千絲萬縷皇上若知其苦當惻然而
動念者何柔何能何食之有也嘉言罔伏乎野無遺
賢乎萬國咸寧乎今旱囊曰簡牘空補而罔功雖喉
乾唇焦而九閤懸隔於萬里羣下之痛哭彌切而天
聽彌高即閣臣一揭不報再揭不報亦僅僅付之發

抄塗人耳目而已而賢之待用者俟一官如河清賢
之逐於衡茅者壯者老者死遂絕望於賜環之詔
甚而中秘之局未結留者散者都泯於無形則摧抑
消磨之法已入於化境而試觀萬國有楚藩之變有
滇南之變又有七下妖賊之變甚者前歲安定門外
嚮馬賊十有萬羣自是羣操軍之馬數十匹跨之而
馳此等景象又豈太平之世所宜有也臣不知罔伏
無遺咸寧者又安在矣罔失法反乎任賢無二乎去
邪無疑乎今儒童毆督學黃學魁毆方司貪黠濫廁

於冠裳重白亢乎武弁壞法亂紀三尺爲掃地矣
而端人正士介然絕俗不惡而人自畏不冰而人自
寒媚嫉生憎至影生疑甚至有二十年進士僅列刑
曹白首爲郎而構陷者尤坐以營求之名公孤百執
至今無有一人爲之昭雪者臣於此未嘗不咄咄而
長慟也彼儉邪輩側媚便辟登於結納之術善事貂
璫慣造飛語以熟輒繞指之意靠水山攘背裂眦之
形敵清議甚至旁觀者爲之愧所交流而憤憤若罔
覺也臣不知法度者且賢奸之辯又謂何矣前此數

事皆臣所觸目酸心欲陳於君父之前 皇上日月
之明雷霆之斷法古憲天勵精圖治減供億賴商民
舉遺佚行考選置大僚補百職進君子退小人下章
疏肅法度俾刑餘不得銜天憲而恣睢奸宄不得亂
王章而跋扈九邊臣共勵將士董守堠堡使我虜
不得時入境蹂躪斯元氣以暢神氣以張而宇
宙登春自矣臣幡然於幣聘之來愴然抱捷市之
耻一賢不用則曰竊位之羞一六不獲則曰時予之
辜非堯舜不陳有謨謀入告而唐虞盛祭豈令其專

美於前代書曰若藥不瞑眩厥疾不廖今之世道如
人一身當虛羸之甚固宜滋補當閉結之極不廢疏
通苦痔悶利之時而優游歲月徒以參苓之劑投
之是氣泄脊脊耳臣愚暗書生不知忌諱犬
馬微忱惟圖報稱身碎骨亦無所恨因此不避斧
鑕敬陳一得臣無任惶悚待命之至

聖學方新仰祈宸斷力行以光聖德疏

汪若霖

禮科右給事中

萬曆

三十四年三月

臣惟^性有天下者莫大乎被聖人之名而屹然必爲聖人之事故堯曰允執文曰誕登詩書加之頃者皇上銳意崇文降心嚮道於春秋大學衍義補兩書特賜闡釋仍徵用儒士講供事天語傳宣滿朝懽悅聖人之間學若此其勤矣於是徽號崇而乘輿親宏模頒而封建定覃恩錫類宇宙大同至以皇明典禮刺訛扶微則又滿朝驚嘆聖人之問學果不可及

也然而講幄猶虛簡命尚格方辰易邁喜念正微

臣

竊疑之夫

皇上勃發宸衷條傳加問斯豈

臣

下口

舌所能過微

皇上試檢此時此心何如明湛何如

振兢豈其持之太

固反交戰未可自決耶抑恭

默以思姑緩諸所之關說耶易傳有之復其見天地

之心乎天地有窮一陽乃兆故造物之大不患其剝

而患其不復聖人之學亦復如是是故智勇兼錫有

迷卽開是爲不遠之復並逸職要側身不仁於是有

休復之書以證其德躁而乘危於是有頻復之厲

皇上萬幾叢委豈無翫紛一旦收攝神明歸之義理
斯亦天地一陽之日矣夫時不可過機不可頓賢不
可得令不可玩 皇上何不祇敦前旨益矢初心間
舉曠儀以敷文明亟聞儒碩以大啓沃夫廣廈細旃
之上羣賢時集百官惟熙討 皇極之精微肅青宮
之型範以衍無疆臣天地固不休哉臣蓋 觀 皇
上則神聖文武之主曠百世而一出者也何者古之
人君出入燕閒必有誦訓箴諫之官蚤夜兢兢而猶
不能無失焉 皇上深宮靜俚有年矣臣阿自耀魁

柄獨持左右不聞有鳴龜之灼而臣下以凜然命不
給臣故曰皇上神聖文武之工曠百世而一出者
也然而弛張以稍憑於意氣可否亦太役其神聰夫
意氣之所乘則不進銳退速之患聰明之用太
勤則寧謐之象不著天下臣工如在高天閃電之下
耳目駭異而有所不定是故不肖者或以僥倖匿垢
卽賢者亦不免以放析就功悠悠議論有不必行何
者時勢之所趨固不能責以大中至正之道而盡繩
以祖宗之法也臣嘗痛宋室以新法明亂天下今

天下則以漸棄成法而陰壞之卽六部九卿晨星幾
盡官少則罅漏必多權併則專私易騁 皇上本欲
擇人任事而事反以因循滋弊 皇上方欲爲官擇
人乃更有庸回苟且偏據之以爲利而不可問者于
國家亦何益哉春官賞善罰惡如天道無心而寒暑
盈虛大節不變大新之本乃在正心誠意不少
偏駁至於舉貢必先選不善必遠呼吸疾徐皆符天
理此聖 所以平天下之要法也伏惟 聖明留意
緝熙終始惟一穆清之內常令賢人君一考究剪祓

宏開昭曠之原係示蕩平之路以及部院大臣莫不
簡任以爲成功夫向者經筵盛本一人清問於此九
卿立諫分班環聽太宰有道之象可遠而觀也 皇
上何難不 振飭 聖人之偉業哉若夫東宮講
讀燕翼攸關曠歟 殊非舊典尤願 皇上之亟
行之揔以彰聖明之舉動用貽休於萬世也 臣謹遵
職掌輒效狂愚不任戰慄待命之至